

ՕՐԵՆՔ ԿՈՒԼՏՈՒՐԱՅԻ ՀՈՒՇԱՐՁԱՆՆԵՐԻ ՊԱՀՊԱՆՈՒԹՅԱՆ ՄԱՍԻՆ

Հայաստանը հին քաղաքակրթության երկիր է: Նրա բնիկները մարդկային հասարակության արշալույսից ի վեր ապրել են այստեղ և աչքի ընկնող հետքեր թողել երկրի զարգացման հաջորդական բոլոր դարաշրջաններում:

Ուրարտուի անկումից հետո՝ մ. թ. ա. VI—IV դարերում, իր ավարտին է հասնում հայ ժողովրդի կազմավորումը, և հայկական ցեղերի ու ցեղախմբերի դարավոր, բայց մինչ այդ տեղական անջատ-անջատ մշակույթների և ուրարտականի ժառանգության հիման վրա ձևավորվում է վաղ հայկական մշակույթը, իր նյութական հուշարձաններով, երգերով, առասպելներով: Հայաստանը մեկն է այն երկրներից, որոնք ոչ միայն հաղորդակից դարձան անտիկ աշխարհի ժառանգությանը, այլև սեփական հողի վրա զարգացրին հելլենիստական գծեր ստացած, բայց ինքնատիպ ու ինքնուրույն իրենց մշակույթը:

Ֆեոդալական հասարակության ժամանակաշրջանում Հայաստանը, արաբական և բյուզանդական քաղաքակրթություններին համաքայլ, անցնելով վայրէջքի և վերելքի, անկման ու ծաղկման մի քանի փուլերով, սեփական ժողովրդի ջանքերով և շինարար ձեռքերով ստեղծել է նյութական և հոգևոր մշակույթի բազմաթիվ կոթողներ:

Հայ ժողովուրդը շատ բան է պահպանել այդ զանձերից, մեզ հասցնելով մի մեծ ժառանգություն, որն աչքի է ընկնում ոչ միայն ինքնուրույնությամբ, այլև արևելքի ու արևմուտքի մեծ քաղաքակրթությունների հետ ունեցած իր բազում կապերով ու աղերսներով: Ուստի, այն ունի ընդհանուր պատմագիտական, ճանաչողական նշանակություն, և պատահական չէ, որ նրանով հետաքրքրվում ու զբաղվում են թե՛ արևելքում և թե՛ արևմուտքում:

Հայ մշակույթի շատ գործիչներ անցյալ դարի վերջերին և դարիս սկզբներին, լավ ճանաչելով Հայաստանի հուշարձանների արժեքն ու նշանակությունը, մեծ վշտով են արձանագրել նրանց անմխիթար վիճակը, քայքայումն ու կործանումը՝ ժամանակի և մարդկանց ավերիչ ներգործությամբ:

Սովետական կարգերի հաստատումը՝ հայկական պետության ստեղծումը, բացառիկ մեծ

նշանակության պատմական եղելություն էր ամբողջ հայ ժողովրդի բախտի, նաև մշակութային կյանքի համար:

Սովետական իշխանության առաջին իսկ օրերին մշակութային հուշարձանները հուշակվեցին համաժողովրդական սեփականություն և վերցվեցին պետական հոգատարության ու պահպանության ներքո: Դեռևս 1923 թ. ստեղծվեց հատուկ պետական մարմին՝ Հայաստանի հուշարձանների Սոցիալիստական Հանրապետության կենտրոնական գործադիր կոմիտեին առընթեր Հայաստանի հնությունների պահպանության կոմիտեն:

Հուշարձանների պահպանության գործը գլխավորեցին կամ իրենց եռանդուն ջանքերով դրան մեծապես օժանդակեցին հայ մշակույթի մի շարք ականավոր գործիչներ՝ Մարտիրոս Մարյանը, Ալեքսանդր Թամանյանը, Թորոս Թորամանյանը, Հովսեփ Օրբելին և ուրիշներ:

Հաշվի առնվեցին երկրով մեկ սփռված հուշարձանները, կազմվեցին պահպանության ենթակա հուշարձանների ցուցակները, տրվեց առաջին օգնությունը կործանման ենթակա հինավուրց շինություններին: Մշակույթի գանձերը պահպանելու, ուսումնասիրելու և ժողովրդին ներկայացնելու համար ստեղծվեցին պետական և գավառական թանգարաններ: Մատենադրական ձեռագիր գրավոր ժառանգության պահպանության և ուսումնասիրության գործը կատարում է մեր Մատենադարանը: Անցած տարիների ընթացքում վերանորոգվել և կործանումից փրկվել են շուրջ 150 առանձին կամ խմբային հուշարձաններ, կատարվել են 4000 չափադրական գծագրեր, 140 հուշարձանի զեղեղիական հանույթներ, մեծ թվով լուսանկարահանումներ և այլն: Հանրապետության մայրաքաղաք Երևանում և այլ քաղաքներում ու վայրերում կառուցվեցին ճարտարապետական նոր րարձարվեստ շենքեր, կանգնեցվեցին նոր հուշարձաններ՝ նվիրված պատմական եղելություններին, հեղափոխական գործիչներին՝ մեծ Լենինին, Շահումյանին և նրանց զինակիցներին, մշակույթի ականավոր վարպետներին, հիմնվեցին զրոհների տուն-թանգարաններ, կառուցվեցին 1915 թ. Մեծ եղեռնի, 1918 թ. Սարդարաղի բախտորոշ ճակատամարտի հուշար-

ձանները, կանգնեցվեցին Հայրենական մեծ պատերազմում զոհվածների հիշատակը հավերժացնող հուշարձաններ: Հայ ժողովրդի նյութական և հոգևոր մշակույթի գանձարանը մեծապես հարստացավ նոր տիպի և նոր բովանդակության հարյուրավոր կոթողներով:

Հուշարձանների պահպանության պետական և հասարակական լայն մասշտաբներով կատարված դրական աշխատանքի կողքին կան նաև խոշոր թերություններ: Աշխատավորների դեպուտատների քաղաքային, ավանային և գյուղական ևովետները, որոնց վրա է դրված հուշարձանների պահպանությունը, նկատելիորեն թուլացրել էին իրենց աշխատանքներն այդ ուղղությամբ: տեղական որոշ սովետներ անգամ մոռացության էին մատնել այդ պարտականությունները: Հուշարձանների պահպանությունը հանրապետության մասշտաբով գլխավորող պետական մարմնի՝ Հայկական ՍՍՀ Մինիստրների սովետի շինարարության պետական կոմիտեի հուշարձանների բաժնի և հուշարձանների վերանորոգումները իրականացնող շինարարական տեղամասի կառուցվածքը և հնարավորությունները չէին համապատասխանում նրանց առջև կանգնած խնդիրների նշանակությանը և ծավալին, անբավարար էր հուշարձանների հսկողությունը, թուլացել էր հասարակական հոգատարությունը այդ գործում:

Այս ամենը ունեցան անցանկալի հետևանքներ, եղան հուշարձանների ավերման դեպքեր, հայտնվեցին հանցագործ գանձախույզներ, որոնք փորփրում էին հուշարձանները, վնաս պատճառում նրանց: Անբավարար էին պեղումներով բացված հուշարձանների վերանորոգման, ամրացման և պահպանման աշխատանքները, անուշադրության էր մատնված հանրապետությունում ծավալված շինարարական մեծ աշխատանքների ժամանակ երևան եկող հուշարձանների ուսումնասիրության և պահպանության գործը, դեռևս անհրաժեշտ ծավալի աշխատանքներ չէին կատարվում հուշարձանների բարեկարգման ուղղությամբ, առանձին դեպքերում նրանց շուրջը կամ նրանց կից ապօրինի կերպով կառուցվում էին նոր շենքեր և այլն:

Հուշարձանների պահպանության գործում առաջացած նոր խնդիրները և նկատվող թերությունները չէին կարող չմտահոգել հասարակաշխույթյանը և պահանջում էին պետական ու հասարակական խոշոր ծավալի և վճռական միջոցառումների իրականացում:

Հասարակական կարգի ամենախոշոր միջոցառումը եղավ հուշարձանների պահպանության հայկական կամավոր ընկերության ստեղծումը 1965 թ., որի անհատական անդամ-

ների թիվն այժմ անցնում է 90 հազարից, իսկ կուլեկտիվ անդամների թիվը՝ 2000-ից: Ընկերությունը բոլոր քաղաքներում և շրջաններում ստեղծել է իր կազմակերպությունները, շրջանային խորհուրդները, հանրապետական խորհուրդը և նրա վարչությունը, իր անդամների միջոցով կատարում է մաքրման և հասարակական հսկողության աշխատանքներ, իսկ անդամավճարներից ստացվող գումարները հատկացնում է հուշարձանների պահպանման և վերանորոգման նպատակին:

1967 և 1968 թթ. վերջերին Հայաստանի կոմունիստական կուսակցության Կենտրոնական կոմիտեն, ՀՍՍՀ Գերագույն սովետի նախագահությունը և Մինիստրների սովետը քննության առան հուշարձանների պահպանության վիճակը և իրականացրին այդ ուղղությամբ տարվող աշխատանքների բարելավման մի շարք միջոցառումներ. աշխատավորների դեպուտատների տեղական սովետները աշխուժացրին իրենց աշխատանքը հուշարձանների պահպանության ուղղությամբ, վերակազմվեց և կազմակերպությունն ամրապնդվեց հուշարձանների պահպանության պետական մարմինը՝ Հայկական ՍՍՀ Մինիստրների սովետի շինարարության պետական կոմիտեի հուշարձանների պահպանության բաժինը, որը վերածվեց վարչության, իսկ հուշարձանների վերանորոգման շինարարական տեղամասը՝ հուշարձանների վերականգնման գիտառեստավրացիոն արվեստանոցի: Համապատասխանաբար ընդարձակվեցին նրանց աշխատակիցների կազմը, ֆինանսական և տեխնիկական հնարավորությունները:

Մինիստրների սովետի որոշմամբ մեծ ծավալի աշխատանքներ կատարվեցին էրեբունի—Երևանի 2750-ամյակի կապակցությամբ, ինչպես էրեբունի ուրարտական քաղաքի միջնաբերդում և նրա շուրջը, նույնպես և ուրարտական Թեյշեբաինի քաղաքի և միջնաբերդի սահմաններում, հնագույն բնակավայր Շենգավիթում, Ավանում և այլուր: Հիմնադրվեց «էրեբունի» թանգարանը, տեղական թանգարան ստեղծվեց Շենգավիթում, բարեկարգվեցին մի շարք հուշարձաններ:

Պետական լայն ծավալի միջոցառումների այդ շարքում հատուկ տեղ է գրավում հուշարձանների պահպանության վիճակի քննարկումը Հայկական ՍՍՀ յոթերորդ գումարման Գերագույն սովետի հինգերորդ նստաշրջանում, որը տեղի ունեցավ 1969 թ. հուլիսի 17-ին և ընդունեց կուլտուրայի հուշարձանների պահպանության վերաբերյալ հատուկ օրենք (օրենքի տեքստը հրապարակված է «Սովետական Հայաստան» թերթի 1969 թ. հուլիսի 18-ի համարում): Հարցի քննարկումը նստաշրջանում և ընդունված

օրենքը նշանավորում են հուշարձանների պահպանության նոր փուլը և անդրադարձնում են այդ բնագավառում հանրապետության առջև ծառացած ավելի ծավալուն խնդիրներն ու միջոցառումները:

Օրենքի առաջին հոդվածը հռչակում է, որ մշակութային բոլոր տեսակի հուշարձանները գտնվում են պետական հաշվառման և պահպանության ներքո: Միաժամանակ օրենքը ընդգրծում է, որ հուշարձանների պահպանությունն ու նրանց նկատմամբ հոգատարությունը հասարակական կազմակերպությունների, կոլեկտիվների և յուրաքանչյուր քաղաքացու պատվավոր պարտականությունն է: Այստեղ իր դրսևորումն է գտնում հուշարձանների նկատմամբ պետական և հասարակական հոգատարության հրկու սկզբունքների ներդաշնակ միասնությունը:

Օրենքում հուշարձանները դիտված են լայն ընդգրկումով և բաժանված 5 խմբի՝ ճարտարապետական, հնագիտական, պատմական (ժամանակակից պատմական-հեղափոխական), արվեստի և գրական հուշարձաններ: Առաջին և երկրորդ խմբի հուշարձանների պահպանության կազմակերպումը, ղեկավարությունը և վերահսկողությունը հանրապետական մասշտաբով ղրվում են ՀՍՍՀ Մինիստրների սովետի շինարարության պետական կոմիտեի վրա, իսկ երրորդ, չորրորդ և հինգերորդ խմբի հուշարձաններինը՝ ՀՍՍՀ կուլտուրայի մինիստրության վրա: Հին ձեռագրերի պահպանության և ուսումնասիրության գործը ղրվում է հին ձեռագրերի ուսումնասիրության գիտահետազոտական ինստիտուտի՝ Մատենադարանի վրա: Թանգարանային արժեքների պահպանությունը վերապահվում է համապատասխանաբար պետական այն մարմիններին, որոնց իրավասությանը ենթակա են այդ թանգարանները:

Օրենքը սահմանում է, որ առանձին հուշարձաններ կամ դրանց խմբերը Հայկական ՍՍՀ Մինիստրների սովետի կողմից արգելավայրեր հայտարարվելու դեպքում պահպանվում են կառավարության հաստատած հատուկ կանոնադրությամբ: Այդ նշանակում է, որ նման հուշարձանների կամ նրանց խմբերի պահպանությունը, բարեկարգումը, վերականգնումը, մասսայականացումը դառնում են կառավարության որոշմամբ իրականացվող հատուկ միջոցառումների և հոգատարության առարկա: Նման լայն ծավալի աշխատանքներ այժմ սկսված են Դառնիում, որտեղ վերականգնվում է I դ. հեթանոսական տաճարը:

Օրենքը պարտավորեցնում է հողային, մելիորատիվ, շինարարական և այլ դործեր կատարող հիմնարկներին՝ հուշարձաններ րացվելու դեպքում

բում անհապաղ դադարեցնել աշխատանքը, հայտնել շինարարության պետական կոմիտեին, կուլտուրայի մինիստրությանը կամ գիտությունների ակադեմիային՝ ուսումնասիրության և պահպանման անհրաժեշտ միջոցառումներ իրականացնելու համար, որից հետո միայն աշխատանքը կարող է շարունակվել՝ Մինիստրների սովետի շինարարության պետական կոմիտեի թույլտվությամբ: Հուշարձանների քանդումը, ձեռափոխումը, տեղափոխությունը կարող են կատարվել միայն Մինիստրների սովետի հատուկ թույլտվությամբ՝ շինարարական աշխատանքներ կատարող հիմնարկ-ձեռնարկությունների հաշվին: Հիմնարկ-ձեռնարկությունների հաշվեկշռում գտնվող հուշարձանների պահպանությունը իրականացնում են տվյալ հիմնարկ-ձեռնարկությունները՝ հուշարձանների պահպանության հանրապետական մարմինների վերահսկողությամբ:

Օրենքը պարտավորեցնում է հնագիտական հուշարձանները պեղող հիմնարկներին՝ պեղումների սկզբից մինչև ավարտը ապահովել ուսումնասիրվող հուշարձանների պահպանությունը, իսկ պեղումների ընթացքում բացված ճարտարապետական հուշարձանների վերականգնումը պետք է իրականացնի Մինիստրների սովետի շինարարության պետական կոմիտեն:

Օրենքը աշխատավորների դեպուտատների քաղաքային, ավանային և գյուղական սովետների գործադիր կոմիտեներին և հուշարձանների պահպանության հանրապետական մարմիններին պարտավորեցնում է սերտորեն գործակցել հուշարձանների պահպանության հայկական կամավոր ընկերության և մյուս հասարակական կազմակերպությունների հետ, հուշարձանների պահպանության նկատմամբ սահմանել մշտական պետական և հասարակական վերահսկողություն և իրականացնել հուշարձանների պահպանության ու բարեկարգման շեֆական աշխատանքներ: Օրենքը նախատեսում է նաև հուշարձանների շուրջը տարվող մասսայական ծավալուն աշխատանքների իրականացումը համապատասխան հաստատությունների, կազմակերպությունների բանավոր պրոպագանդայի, մասսայական հրատարակությունների, մամուլի, կինոյի, ռադիոյի և հեռուստատեսության միջոցով:

Հայկական ՍՍՀ Գերագույն սովետի նստաշրջանում 1969 թ. հուլիսի 17-ին ընդունված օրենքը շրջադարձային նշանակություն կունենա հայ ժողովրդի մշակութային մեծ ժառանգության պահպանության, ուսումնասիրության և մասսայականացման մեծ ու պատվավոր գործում:

Պրոֆ. Բ. ԱՌԱՔԵԼՅԱՆ